

## **A Resaka faharatsiana**

- ❖ Ny fitrandrahana ireo vakoka fahagola dia maneho ny fivavahana tao Kanana ho araka izay lazain'ny Baiboly: ody, sikidy, fifandraisana amin'ny maty, filalaovana angatra... ary fanolorana zaza ho sorona! (Deot. 18:9-12). Ho fanampin'izany ny "fijangajangana masina" - izay tsy misy ifandraisany velively amin'ny fahamasinana - ataon'ny pretra lahy sy ny pretra vavy.
- ❖ Na dia efa fahita tamin'ny andron'i Abrahama aza ireo fanao ireo, dia nomen'Andriamanitra 400 taona mahery izy ireo hanitsiana ny fitondran-tenany.
- ❖ Koa dia, tsy maintsy natsahatra ireny fombam-pivavahana mamohelatra ireny, izay nanimba ny fitondran-tenan'ny olona sy nampirongatra ny faharatsiana isan-karazany. Ny fandringanana ny Kananita — na dia nandritra ny fotoana kely ihany aza — dia natao hampitsaharana ny fahasimban'ny fitondran-tenan'ny olombelona.

## **B Resaka rariny**

- ❖ Fitiavana sy fahamarinana no fototry ny toetran'Andriamanitra. Izany no mahatonga Azy ho mpitsara marina sy tsy miangatra, izay manemotra ny famaizana mba hahatonga ny mpanota hibebaka, kanefa tsy handefitra mandrakizay amin'ny faharatsiana.
- ❖ Ny ady handresena an'i Kanana dia tsy natao hitomboan'ny harena manokana sy hakana fahefana, fa noho ny baikon'Andriamanitra hitondra fitsarana izay mendrika an'ireo mponina ratsy fanahy tao.
- ❖ Ny hanorina fitondram-panjakana ara-drariny ao amin'io faritany io no fanirian'Andriamanitra, izay ho ohatra ho an'ny firenena rehetra, handrisika azy ireo hanandratra ny fitondran-tenany, ary amin'izay dia hanorina fiadanana sy fahamarinana eran'izao tontolo izao (Deo. 4:5-6).

## **D Ny foto-kevitra ara-Baiboly momba ny ady**

- ❖ Araka ny Baiboly, dia voafetra ho amin'ny toe-javatra manokana ary Andriamanitra mihitsy no mamaritra azy ny ady. Ireto ny fitsipika mifehy ny ady izay nahazoana alalana tamin'Andriamanitra:
  - Tsy mahazo alalana ny miaramila matihanina
  - Tsy mandray karama ny miaramila ary indraindray aza tsy mahazo mitondra babo
  - Natao ho fahazoana na fiarovana ny Tany Nampanantenaina ihany ny fanaovana ady tamin'io vanim-potoana teo amin'ny tantara io
  - Mpaminany nahazo tsindrimandry tamin'Andriamanitra (toa an'i Mosesy na Josoa) no nitarika izany.
  - Nitaky fiomanana ara-panahy ny ady
  - Noraisina ho fahavalo izay Isiraelita rehetra tsy nankatò ny fitsipiky ny ady
  - Imbetsaka Andriamanitra no niditra an-tsehatra mivantana tamin'ny ady

## **E Ringana noho ny safidiny ihany**

- ❖ Nambara ho voaozona ny tany Kanana manontolo, izany hoe natokana ho amin'ny fandringanana. Natao ho vonoina avokoa ny olo-miaina rehetra (Deot. 20:16-18; Jos. 10:40). Na izany aza, nisy tsy natao an'izany:
  - Ireo natokana haringana nefa nankatò an'Andriamanitra dia ho velona (oh: Rahaba)
  - Ny Isiraelita izay tsy nankatò an'Andriamanitra dia natao maty (oh: Akana).
- ❖ Nitovy ny fiheverana ny Kananita sy ny Isiraelita teo anatrehan'Andriamanitra: tsy nisy fiangarana. Ny tsy fitoviana dia teo amin'ny safidy nikiry hikomy tamin'Andriamanitra, na hankatò Azy.
- ❖ Ankehitriny, dia antsika ihany ny fanapahan-kevitra. Rehefa ho avy Jesosy dia na ho voavonjy na ho haringana noho ny safidintsika isika.

## **F Mikatsaka fiadanana**

- ❖ Antsoina hoe “Andrian'ny fiadanana” i Jesosy (Isaia 9:5). Tonga hitondra fiadanana lzy, ary hanjaka anaty fiadanana. (Jaona 14:27; Isaia 60:17).
- ❖ Saingy mandra-pahatongan'ny fanjakan'ny fiadanana dia mbola ao anatin'ny faritry ny ady isika, ao anatin'ny fifanandrinana eo amin'ny tsara sy ny ratsy izay mahafaoka an'izao rehetra izao.

- ❖ Rehefa nanao fahirano an'i Dotana ny miaramila Syriaana mba hisambotra an'i Elisa mpaminany, dia tsy nangataka tamin'Andriamanitra izy mba hanampian'ny tafiky ny lanitra izay nanodidina azy handringana ny Syriaana. Nangataka kosa izy ny hitarihana ny miaramila Syriaana izay jambena mba ho any Samaria, ka hahatonga fihavanana eo amin'ireo firenena roa miady ireo (2 Mpanjaka 6:12-23).
- ❖ Izao no ohatra ampianarin'i Jesosy antsika: mikatsaka fiadanana mandrakariva ao anatin'ny fifandirana. Mandresy ny ratsy amin'ny soa (Rom. 12:20-21).